



Bandet under dagens støttekonsert.

Veteranbandet i UML markerte i dag si støtte til innsamlinga som skal sikra at nakkeskadde og ME-sjuka Eirik Aksnes skal få ein nødvendig og viktig operasjon i Tyskland. Dette gjorde dei ved å halda konsert ved inngangen til Spar Uskedalen. I tillegg delte dei ut kort med informasjon om korleis ein kan støtta innsamlingsaksjonen.

Innsamlinga har fått velfortent og god respons. Til no har 711 givarar bidrege til at spleisen til no har passert 236.000 kroner. Dermed har dei nådd 59% av målet for innsamlinga på 400.000 kroner. Til saman vil ambulansetjening og operasjon i Tyskland komma på ca.750.000 kroner.

Bandet opna konserten med klassikaren *Jag har drømt om en stad*, og deretter fortalde tubaist Thor Inge Døssland om bakgrunnen for konserten, og eit sterkt ønskje frå musikarane om å markera si støtte til innsamlinga. Etter det fortsette dei med publikumsvennlege perler frå repertoaret sitt. Blant desse presenterte dei to nyinnøvde stykke i svingande og gode arrangement av ein av bandet sine favorittarrangørar, - Inge Sunde. Både *A fool as I am* og *Det var på Capri* fall tydelegvis i smak hos publikum.

Trass i det litt kjølige veret vart det ei triveleg musikkstund for både publikum og musikarane i bandet. I tillegg vart det sett fokus på ei viktig sak, og det er å håpa at givargleda held fram framover. Kjekt er det om andre lag og firma viser si støtte i tillegg til privatpersonar. Korleis ein kan bidra i innsamlinga vert det opplyst om øvst på framsida her på uskedalen.no.

Tekst og nett: Thor Inge Døssland

Foto: Åse M. Neset